

Najib Tiba Di Singapura, Lancar Agrobazar Pertama Malaysia Di Seberang Laut Bernama

August 27, 2014

Oleh Tengku Noor Shamsiah Tengku Abdullah

SINGAPURA, 27 Ogos (Bernama) -- Perdana Menteri Datuk Seri Najib Tun Razak tiba di sini hari ini untuk lawatan kerja sehari bagi merasmikan pembukaan outlet Agrobazar pertama Malaysia di seberang laut.

Najib yang diiringi isterinya Datin Seri Rosmah Mansor, tiba di Lapangan Terbang Antarabangsa Changi pada 5.15 petang.

Turut hadir menyambut beliau ialah Pesuruhjaya Tinggi Malaysia di Singapura Datuk Husni Zai Yaacob dan isteri Datin Norshiha Hasbullah.

Sebelum itu, Kementerian Luar Singapura (MFA) dalam satu kenyataan berkata Perdana Menteri Singapura Lee Hsien Loong telah dijemput oleh Najib untuk turut sama merasmikan pembukaan bazar itu pada sebelah petang.

MFA berkata berikutan pelancaran Agrobazar itu, Lee dan isterinya, Najib serta Rosmah akan melawat Hab Sukan Singapura yang baru siap dan menghadiri majlis makan malam yang dihoskan Lee.

Semasa Pemukiman Pemimpin Malaysia-Singapura di Kuala Lumpur pada 7 April, 2014, Najib mengumumkan Agrobazar itu merupakan inisiatif Kementerian Pertanian dan Industri Asas Tani serta Lembaga Pemasaran Pertanian Persekutuan (Fama).

Agrobazaar itu terletak di Lots 37, 39, 41 dan 43 Sultan Gate dan akan mempromosikan pilihan buah-buahan segar dan produk berasaskan pertanian dari Malaysia.

-- BERNAMA

Copyright © 2014 BERNAMA

Source : <http://www.bernama.com/bernama/v7/bm/newsindex.php?id=1063910>